

29/07/2000

Sabah bakal jadi tumpuan dunia

KOTA KINABALU, Jumaat - Sabah bertuah menjadi tuan rumah pelaksana bagi pertandingan pengembaraan lasak Eco-Challenge Sabah 2000 memandangkan acara itu dianggap ekspedisi sukan kembara utama dunia.

Pertandingan yang akan bermula pada 20 Ogos hingga 2 September depan disertai 78 pasukan, termasuk dua pasukan dari Malaysia iaitu Pasukan Sabah 2000 dan Pasukan Toyota 2020.

Ketua Menteri, Datuk Osu Sukam, berkata dengan menjadi tuan rumah, Sabah khususnya dan Malaysia umumnya berada sebaris dengan kehebatan negara seperti Australia, Argentina dan Amerika yang pernah menjadi tuan rumah bagi acara berprestij itu.

"Dengan menjadi tuan rumah bagi acara ini, Sabah khususnya dan Malaysia umumnya akan menjadi tumpuan seluruh dunia memandangkan acara ini akan mendapat liputan luas.

"Acara Eco-Challenge Sabah 2000 ini dapat ditonton kira-kira 144 juta rumah di 145 negara dalam lima benua," katanya.

Beliau berkata demikian pada majlis penyampaian sumbangan dari penaja bagi Eco-Challenge Sabah 2000 di Magellan Sutera Hotel di sini, petang semalam.

Majlis itu dirasmikan Perdana Menteri, Datuk Seri Dr Mahathir Mohamad.

Hadir sama Menteri Kebudayaan, Kesenian dan Pelancongan, Datuk Abdul Kadir Sheikh Fadzir; dan Menteri Pembangunan Pelancongan, Alam Sekitar, Sains dan Teknologi Sabah, Datuk Chong Kah Kiat.

Osu berkata, selaras Tahun Melawat Sabah 2000, acara Eco-Challenge itu pastinya mampu menarik lebih ramai pelancong luar datang ke Sabah khususnya dan Malaysia umumnya.

Katanya, jumlah pelancong Amerika yang datang ke Sabah dalam tempoh dua tahun lalu adalah kira-kira 5,680 orang.

Ia adalah sebahagian daripada 83,000 pelancong Amerika yang datang ke Malaysia dan menyumbang pendapatan RM19.8 juta bagi negeri ini.

"Jumlah kedatangan pelancong ini tidaklah begitu ramai berbanding kedatangan pelancong Amerika ke negara jiran kita seperti Singapura, Thailand, Filipina dan Indonesia.

"Oleh itu, kita harus memaksimumkan publisiti dalam berbagai-bagai acara seperti Eco-Challenge dan juga siri TV SURVIVOR yang memberikan gambaran mengenai Pulau Tiga," katanya.

Sementara itu, Osu berkata jumlah media yang memberi pengesahan setakat ini untuk memberikan liputan bagi acara Eco-Challenge adalah menggalakkan.

"Penyertaan daripada rangkaian kabel dan televisyen termasuklah dari USA NETWORKS, Discovery Channel Canada, Sony's AXN Channel dan Entertainment Tonight," katanya.

(END)